



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tiryimyim@aolima tir yimyim TAPAK 8

India nung Coronavirus agi teshirangdakpur 2,555 dang kumogo

Inter Miami-i Lionel Messi aitsü aliba ajanga fan tem pelateper



VOL. XX NO. 238 (ADOK 238) DIMAPUR KÜPTOKNÜ (SATURDAY) AAMI (JUNE) 10, 2023 ₹ 5.00

Manipur nung Kuki nunger 3 khaset Tantsür ka tenla kidang sarasadema lia khaset

Guwahati, June 9, 2023 (Agencies): Manipur nung Hokolbarneq telungpurtemi Army süoshi agir oa nisung asem khaset.

Iba lendong ya Hokolbarneq 4:00 ako meta Khoken yimtsüung nung atalok. Iba yimtsüung ya Kuki nunger teimba ser aliba Kangpokpi district aser Meitei nunger teimba ser aliba Imphal East district na arrtsü nung lir.

Iba lendong nung Jangpao Touthang, Khaimang Guite aser Domkhohoi nunger khaset aser Thongneh o Thangkhojang na yirua lir ta osang angazüker.

Army indang combing operation inyaksü atema aru asütsü akok ta yimdaklirtemi bilem saka telungurtem jagi parnok dak injang khaloktsü ta Indigenous Tribal Leaders' Forum (ITLF)-i sangdong ka nung metetdaksü.

Iba mapang Domkhohoi ya tenla kidang anepdang züngia sarasadema liasü saka telungurtemi tekülem ki hao ta mali khaset, ta ITLF-isa ashi.

"Telungpurtemi Army uniforms aser garitem ya kong nungi angur ta tebilemtsü tulu abener aser iba nung temaba tashi kari yaritepba ajitetter" ta parnokisa metetdaksü.

"Union Minister of Home Amit Shah-i anogo 15 nü yimjung nung alitsü ayongzükaka Arambai Tenggol aser Meitei Leepun amala Meitei nunger teloktem aser Meitei nunger asoshi bilemtsüba state sorkari hao ta

melii ozüing alema inyaksangshir. Iba ina inyakyim ajanga Union Minister-i yimjung alitsü ayimoktsüba mezüingmeshiba sayur" ta ITLF-isa ashi.

"Iba ama mapang tamajung nung onoki Khoken nunger den külemi noktaker. Lokti ka ama onoki nungdakba mapa inyaksü aser Meitei nungeri Kuki-Zo nübertem samatsütsü merangba noktangtsü atema taküm bendanga agütsütsü" ta ITLF-isa metetdaksü.

Committee on Tribals Unity (COTU)-ia Union Home Minister Amit Shah dangi Khoken yimtsüung nung atalokba lendong indang shidi ka zülüogo.

"Kuki nungeri yimjung bener arutsü ta teimla tulu nung combing operation pusema nungit saka iba teimla samaogo aser takoksa tulu bentsür aruogo" ta COTU-i shidi nung shia lir.

Meitei nunger telungpurtemi arishi küm 75 tain Domkhohoi Haokip ya tenla kidang sarasademya lia khaset. La indang kinungbo ya Ex-Serviceman ka liasü ta yimdaklirtemi ashi.

Sepaitemi combing operation inyaksü atema aru asütsü akok ta yimdaklirtemi bilem saka telungpurtemi parnok dak injang khaloktsü.

Idangji iba yimtsüung anasa Gurkha Rifles liasü aser parnok tesem tonga arur telungpur den khatap. Sepaitem mapang shitak nung aruba ajanga azütokshi aika ajurutsü aliba nungi kümzük ta yimdaklirtemisa ashi.

Manipur Naga MLA temi Naga nunger litsü kümzükä yunür



June 9, 2023 nü Niathu Resort, Chumukedima nung Manipur nungi Naga nunger MLA 10-i osangbener den jembidang agiba noksa ka angur.

Dimapur, June 9, 2023 (TYO): Manipur nung Kuki-Meitei ketdangsübaren balaka akümtsüsa kümra iba nung Naga nunger tesemtem nung mekongshitsüla ta Manipur nungi Naga MLA 10-i metetdaksü.

Manipur nung Naga MLA 10-i Union Home Minister Amit Shah den ajurutepa state tensa osang lemsatepba sülen tanü Nagaland tonga aru.

Hokolbarnü parnok Niathu Resort, Chumukedima nung osangbener den jembidang Union Home Minister dang Naga tesemtem nung mekongshitsü ashiba osang lemsatep.

"Manipur nung ketdangsübaren balaka akümtsüsa kümra Naga nunger tesemtem nung mekongshitsüla kechiyong

iba atema küm aika jembia arur aser tebilemtsü den khuret aika ajuruogo ta onoki Amit Shah dang shiogo" ta Manipur nung Water Resources, Relief, Disaster Management Minister Awangbow Newmai-i ashi.

Parnokisa Union Home Minister dang Naga nunger den asüngdangteptsüla kechiyong Naga nungeri India sorkar den yimjung maparen teinyakdak lir ta ashi.

"Naga nunger asoshi inyakyim tasen kar tenzüktsü süra, ibaji India sorkar aser Naga nunger tsüngda tang teinyakdak yimjung maparen nung aliba ama asütsüla kechiyong onoki teti atema lemtet ka agitsü imlar" ta Minister Newmai-i ashi.

Union Home Minister-ia Naga

nunger MLA tem dang Manipur nung ketdangsübaren balaka tenzüktsü mesüra tanga sentong kar renemra, Kuki, Meitei aser Naga nunger ajak den asüngdangtepa inyaksü. Shinga senzükä meyütsütsü saka tamasa yimjung alitsüla ta ashi.

"Naga nunger ya yimjung meimertem lir aser onoki rara anema noktaker. Onoki ozü kidangertem tsüngda rara madokdaksünür. MLA tem ama onoki akokba tashi kin ana tsüngda tangatetep kati arutü atema inyaker" ta Minister Newmai-isa metetdaksü.

Züngsem 10 agi akümba Manipur Naga MLA 10 rongnung NPF nungi par 5, BJP nungi 2, NPP nungi 2 aser Independent MLA ka dena lir.

CP Dimapur-i ozüing alema inyakerkem azüoktsü ayongzükä

Dimapur, June 9, 2023 (TYO): Commissioner of Police, Dimapur Kevithuto Sophie, IPS-i Hokolbarnü CP Conference Hall, Dimapur nung Dimapur, Chümoukedima aser Niuland nungi public lennirtem den sensaksem sentong ka ayonga agiogo.

Loktiliba ali tashi ozüing alema inyaksangshiba mesamatsü aser item khuret koktetsü atema asenok ajak longjemer inyaksüla, ta Kevithuto Sophie-i ashi.

"Ozüing alema mozü shibelenba, tashiyim agi sen saruba, yi memeyoktepa aser ILP tebilemtsütem anema asenok ajak amalitepa yaritep nung dang takok angutsü anungji public lennirtemi mapang shitak nung Police department nem osang sangoktsütsü ayongzükä" ta paisa ashi.

"Public lennirtemi pei pei colony aser yimtsüngtem nung lokti anema inyakba osang prokshitsüla aser GBs o village

Council-ia tangalen nungi arur nem PRC kanga dang kümdanga agütsütsüla" ta Commissioner of Police-isa metetdaksü.

Highway nung gari mashii aniba ajanga lendong ataloker aser lendong teimbaka two-wheeler anishirtemi ajurur, ta paisa tebilemtsü ka lemsatep.

Iba sentong nung DCP Niuland, ADCP Dimapur, ADC Chümoukedima, GBs aser CSO lennir balalai pei pei tebilembatem lemsatepa liasü.

Popsicle Ice Cream Factory nem tetuyuba agütsü

Dimapur, June 9, 2023 (TYO): Directorate of Health & Family Welfare-i Popsicle Ice Cream Factory, Dimapur nem 'improvement notice' ka agütsü.

Popsicle Ice Cream Factory, Dimapur dak sendakba video ka adokba dak sendakba nung Food Safety Team, Dimapur-i iba factory semdang aser FSS Act' 2006 kübok improvement notice agütsü, ta State Programme Officer (Food Safety), Dr. John Kemp-i ashi.

Maneni, Food Safety Officer, Dimapur-isa State Food NABL Accredited laboratory nung Quality Testing atema sample kar bendenogo, ta pai ashi.

Iba dak sendakba nung Popsicle Ice Cream factory kibur nem anogo 14 züngzüktsür aser iba tsüngda FSSA Rules and Regulations nung lateta aliba ama mapa inyaksü tuyur. Ajisüaka iba tetuyuba sülen manidakra Food Business Operator dak ozüingi melaba mapa inyaksü, ta Dr. John Kemp-i metetdaksü.

Nagaland nung School Safety indang maparen tenzüktsü

Kohima, June 9, 2023 (TYO): Hokolbarnü Nagaland State Disaster Management Authority (NSDMA), Department of School Education (DoSE) aser NagaEd tsüngda Nagaland Disaster Management School Safety Policy (NDMSSP) mapa tenzüktsü atema Service level Agreement nung sign sütepo.

Iba tenangzüktep nung Commissioner & Secretary School Education Kevileno Angami, Commissioner & Secretary NSDMA Lhouchalie Viya aser NagaEd operations manager Marina Dzuvichu nungeri sign asü.

Iba mapang Joint CEO NSDMA Johnny Ruangmei aser School Education Principal Director Thavaseelan K na liasü.

NDMSSP ya taküm December ita tesayurtem atema tenzüktsü. Nagaland nung sorkar aser nija school nungi tesayur 10000 tashi training agütsütsü alizüing lir aser iba ajanga school safety nung temelenshi tulu

angutsü.

"Mezüngbuba shilem nung tesayur 5000 (sorkar 4000 & nija 1000) nem training agütsütsü" ta Assistant Manager (Training & Education) NSDMA Khrolou Koza Lohe-i ashi.

Shisaliok nung school safety ya kanga dang tongtipang shilem ka lir aser iba nung alima lendong balala, lendongtsüdong, tanur dak tashiyim mapa inyakba, merenshiba, ozüing alema inyaksangshiba aser menatepba tashidak tayongzükbatem dena lir, ta Lohe-i ashi.

Item tebilemtsütem asoshi NSDMA-i School Safety Policy ka yanglu aser iba nung Nagaland nung aliba school tem asoshi guidelines & procedures dena lir, ta laisa ashi.

Kaketshirtem aser staff asoshi NSDMA, DSE aser NagaEd-i School Safety Policy digitize asütsü mapatong ka tenzükä, ta Lohe-isa shisem.

Iba tenangzükba ya tesayurtem nem online mode

ajanga disaster management atema training agütsütsü aser pei pei school safety plan yangluba nung yariteptsü atema agir, ta laisa metetdaksü.

NagaEd-i digital compliance module renemtsü aser amshiyim atema technical support agütsütsü, ta Lohe-isa ashi.

Iba course nung NSDMA-i senotsü teyari agütsüba den facilitator aser interlocutor ama inyaksü aser Department of School Education-i training atema tesayurtem tenüing agütsütsü aser certificate courses atema mapa inyaksü ta laisa metetdaksü.

"Iba tesentaktep ajanga school safety nung temelenshi tajung angutsü amanger" ta NSDMA nung Joint CEO Johnny Ruangmei-ia ashi.

"NSDMA aser DoSE den külemi school aser kaketshirtem kümzükä ayutsü maparen inyaksü sendaktepa atema pelar" ta NagaEd Founder Kevisato Sanyu-ia metetdaksü.

NPCC-i Chanakyapuri nung atalokba aitsür

Dimapur, June 9, 2023 (TYO): Gujarat kübok Chanakyapuri nung Naga nunger ana dak tashiyim mapa inyakba aitsür ta Nagaland Pradesh Congress Committee (NPCC)-i metetdaksü.

Iba inyakyim ajanga takoksa ajururtem aser Gujarat Naga Students Union pusema nungiter aser ozüingi melaba ama mapa meinyak tashi onoki inyaksü, ta

NPCC President S Supongmeren Jamir-i sangdong ka nung ashi.

Maneni, Gujarat Naga Students Union-i mapang shitak nung mapa inyakba atema tenüingsang agütsür, ta paisa ashi.

Asenok Naga nunger ajak külemi longjemtsüla aser temeten mangu tashi asenok telongjem aser tashi sayutsü ayongzükä, ta Supongmeren-isa ashi.

AIFUCTO-i NEP 2020 atema khuret lemsatep



Dimapur, Aami/June 09 (TYO): All India Federation of University & College Teacher's Organizations (AIFUCTO) NEC Meeting-cum-National Seminar sentong Kohima Science College, Jotsoma nung 'NEP 2020: Envisioning Quality Higher Education' omen kübok June 9, 2023 nü tenzüko.

Iba sentong ya AIFUCTO & All Nagaland Government College Teachers' Association (ANGCTA) aser Kohima Science College Teachers' Association (KSCTA) lungjemer ayongzüka alitsü.

AIFUCTO tir Prof. Kesab Bhattacharya-i iba sentong nung jembidang, democratic organisations ajungai National Education Policy 2020 nung education system ya E - equity, excellence and education for all meyoktepa alitsüla ta khangkaka 3 C's - centralization, commercialization and communalization ang benok aser iba yongji AIFUCTO ajanga NEP 2020 anema nokdaker, ta ashi.

Education policy ya kanga junga yanglu aser ajaki angatetsüsa lir, saka jungjunga züngdangra ibai lendong aketba education policy ka lir, ta Prof. Bhattacharya-i ashi.

NEP nükjidong ya 2035 tashinung Gross Enrolment Ratio shilem 50 tongtetsüba lir, saka iba atema senotsü jenti indoktsü, ta pai ashi.

Sorkari shisaliok ulushiba ya PPP model ajanga inyaktüsü benoka lir, kong 'private' melen 'philanthropy' inok. Tajangzük angutsü masadangi philanthropic organizations (mapa tajung atema senotsü teyari agütsüba lokti tentet) temi linük nung shisaliok ulushitsü atema sen indoktsü asü, ta pai asüngdang, koba ajanga tajemzükba tia nung alirtem dak kongshitsü aser 'survival of the richest' akumtsü, ta ashi.

Syllabus nungi Darwin's Theory of Evolution, Mendeleev Periodic Table agiener komasür sorkari scientific temper takok aginer, ta Prof. Bhattacharya-i asüngdang.

NEP 2020 indang document nung education nung 'gender equilibrium' mesüra women education indang kecha shia mali, ta pai ashi.

Choice based credit system ya tangatsübo junger, saka higher education nung dropouts tali akumtsü aser ishika dang temaba jenjang tongtetsü.

NEP 2020 nungya aibelen jenti lir aser ajak dang

tongtipangtibaji government school aika shibangtsü aser makamait SC/ST nungi higher education nung aika züngtur anentsü, ta pai ashi.

General Secretary, AIFUCTO, Prof. Arun Kumar-i sentong tenzüka jembidang, linük nung university aser college tesayurtem asoshi national jenjang nung sabangji AIFUCTO ya dang lir aser ibai democratic, secular, scientific aser inclusive education system asoshi inyaker, ta ashi.

AIFUCTO ya 1962 küm tenzüka sülen Indian Constitution metsünga-reta amshir aser linük nung sobaliba balala, tamangba yimsü balala aser oshio ben balala akumtsüboa amshir. NEP ya July 20, 2020 nungi amshi tenzüko aser state aser stakeholders tem tebilemba mangadang, ta ashi.

Iba sentong nung National Secretary, NE Zone, Prof. M. Lokendro Singh ajanga Teachers' Movement in North East India indang jembia liasü. Iba sentong nung President KSCJTA, Dr. Richard Dzüvichü menden liasü aser General Secretary, ANGCTA, Dr. Yelhi Vero-i melepzüing o jembia liasü.

Khensa yimtak konger anepalua yangluba ki lapok



Khensa yimtak konger anepalua yangludak aser konger yanglutsü tesayuba agutsüdak ki ka Mokokchung Additional Deputy Commissioner, Chumlam Humtsoe-I (tachichi nungi pungobuba) lapoktsüba sentong nung konger koma yanglutsü iba indang inyakyim rasa-a züluba kaket Khensa Aluyimer Telok-i adokba sayatsür kelen tangokba noksa nung angur.

Mokokchung, Aami/June 9 (TYO): Khensa yimtak tanü konger anepalua yangludak aser konger yanglutsü tesayuba agutsüdak ki Mokokchung Additional Deputy Commissioner, Chumlam Humtsoe-i lapoktsüo.

Yimtaklirtem, talisa tetsürtem kidang dang inyaka sen aahtsü asoshi Khensa Aluyimer Telok, Khensa Sensotsür Mungdang aser Khensa Women Ministry-i

achayanga konger anepalua yanglur ayoktsü mapa ya inyaktüsü pangjem aser 2018 küm nungi asalendonga aruba tanü iba sentong ya asangsang nung tenzüko.

Tanü iba sentong nung Mokokchung Additional Deputy Commissioner, Chumlam Humtsoe-i jembidang, Naga nungeri pei achitsü asoshi kecha peria mezüsenter, tangar state dak dang metaloker alir, asenok peria chia jema litettsüsa ali

peria lir aser tzü mopung kanga dang tajung, anungji item temoatsütemji amshiteta asenoki züsentsüla, ta ayongzüka ashi.

Paisa Naga nungeri ak shi kanga achir saka ak metsütsübo temolung magütsür, Covid aruba mapang nung chiyungtsü agi anüngba asenoki metetogo, anungji akoktsüba maparen nungbo tezü metangi inyaktüsüla, ta ashi.

(Maneni tapak 8 nung...)

Mokokchung nungghonda ana power shibangtsü

Dimapur, Aami/June 09 (TYO): Alichen nungi Sewak Gate tashi NH-2 lenmang ulushia yangluba maparen nung temdangsunangba electric poles tem tesem melenshitsu atema June 10, 2023 anepdang 9:00 ako nungi 11:00 ako tashi power shibangtsü, ta Er. Achanger T Aier, SDO, Mokokchung

Electrical Sub-Division ajanga sangdong ka nung ashi. Iba power shibangba yagi Mokokchung jila, Asetkong aser Ongpangkong nung aliba yimtsüing ajanga nung kongshitsü. Anungji nüburtemi metokmeperi arema atatsü mepishir, ta sangdong ajanga ashi.

Abu Metha-i Kolkata nung American Centre semdang



Dimapur, Aami/June 09 (TYO): Advisor to Chief Minister & Chairman, Investment & Development Authority of Nagaland, Abu Metha-i June 9, 2023 nü Kolkata, West Bengal nung aliba American Centre semdanga liasü.

Chairman, TaFMA, Theja Meru dener Abu Metha-i Adrian Pratt indang director Sameek Gosh aser Aishiwarya Mondal ajurua liasü. Pai iba mapang education, exchangers aser entrepreneurship densema department balala nungi ketdangsurtem den sensaksema liasü.

Centre ajanga Nagaland aser North East nung sentong balala ayongzüka agiba atema Metha-i US sorkar dang pelaba lemsatepa liasü.

Iba senden nung Metha-i

jembidang Nagaland nung maparen balala inyakba aser tarutsü nung külemi inyaktüsü lenmang aliba indang US sorkar ketdangsur dang ashi.

Iba mapang shisaliok, tajemzükba jenjang nung aliba tanurtem asoshi maongka, aser ano sports, culture, music aser arts amala nung sentong balala indang jembia liasü.

TaFMA chairman, Theja Meru-ia iba senden nung TaFMA kübok sentong balala indang lemsatepa jembishiniü aka aser tarutsü nung music, arts aser culture tsütsü külemi inyaktüsü indang jembia liasü.

Abu Metha aser Theja Meru tenaprong US State Department indang International Visitor Leadership Program (IVLP) nung züngsem liasü.

Ward 21 Welfare Committee ajanga DALT dang pelar

Dimapur, Aami/June 09 (TYO): Dimapur Ao Lanur Telungjem (DALT) ajanga nüburtem asoshi mapa tajung inyakba atema pelaba lemsateper, ta Notun Bosti Colony Council, Middle Point Colony Council, Churches Colony Council aser Nyamo Lotha Colony Council tenung nung Ward 21 Welfare Committee ajanga sangdong ka nung ashi.

DALT ajanga nüburtem asoshi mapa tajung inyaka streetlights inoktsü aser DC Courr Junction nungi Tajen Ao Road tashi lenmang ajanga yanglushia liasü.

DALT ajanga iba mapa tajung ana inyakba yagi tarutsü nung yimti nung tesangwa

tajungba kumdahtsütsü, mapa tamajung inyakba ajemtsü, nüburtem timtem balala nungi kumzüksü aser potholes mechi lenmang nung lendong ajurutsü aliba nungi kumzüksü, ta ashi.

Asen yimti nung lokti tentet ajanga tanü tashinung mapa tajungtiba inyakbaji ibai alitsü aser tarutsü anogotem nung danga lokti tentet asoshi tatishitsü tajung ka ama amshitsüla, ta Ward 21 Welfare Committee ajanga ashi.

Asen yimti aser nüburtem ajungtsü asoshi DALT ajanga mapa tajung inyakba atema tenüngsang agütsütsü langa lir. Nenoki nüburtem asoshi mapa tajung inyakba atema pelaba lemsateper, ta iba Committee ajangasa ashi.

AHoDs/HoDs senden June 13 nü amentsü

Dimapur, Aami/June 09 (TYO): Administrative Heads of Department (AHoDs) aser Heads of Department (HoDs) senden June 13, 2023 nikongdang 1:00 ako nungi tenzüka Secretariat

Conference Hall, Kohima nung amentsü, ta sangdong ka ajanga ashi.

Iba senden nung AHoDs aser HoDs ajak medema arua adentsü metetdaksür, ta sangdong ajangasa ashi.

Jharkhand nung ozüing alema koila atuba ongken chirep; nisung 3 asü



June 09, 2023 nü Jharkhand kübok Bhowra colliery area nung ozüing alema koila atuba ongken ka chirepba sülen kümzükba maparen inyakdang tangokba noksa nung angur. Iba lendong nug nisung asem asü aser aika telung nungji lir ta bilemer.

Ranchi, June 09 (Agencies): Hokolbar anepdang Jharkhand state kübok Bhowra colliery area nung ozüing alema koila atuba ongken chirepba lendong nung tang tashi nung nisung asem asüba jangjaogo aser ano aika ali agi anebanga lir ta bilemer. Hokolbar nep 10:30 ako meta Bharat Coking Coal Limited (BCCL) indang Bhowra Colliery Area nung

iba lendong atalokba sülen Deputy Superintendent of Police (DSP) Abhishek Kumar densema ketdangsertem aika iba tesem jagi oa kümzükba maparen tenzüka liasü. Tenük kuli alirtemi ashiba agi, koila atuba ongken nungji tesem ka chirepba mapang ongken nungji yimdaklirtem aika mapa teinyakdak liasü. Bhowra police station Inspector Binod Oraon leniba

nung kümzükba maparen inyakdar aser BCCL Bhowra Colliery General Manager, SS Das-a iba tesem jagi oa kümzükba maparen achaayangdar. Yaküm February ita nunga Jharkhand nung Dhanbad kübok Gopinathpur area nung Eastern Coalfields meyong koila atuba tesem ka nung ongken chirepba lendong nung nisung pongu asü.

Ghonda 36 tsüingda cyclone Biparjoy ano tesashiba akümtsü: IMD

New Delhi, June 09 (Agencies): Arabian Sea nung liasü, ta Ghonda 36 tsüingda cyclone Biparjoy ano tesashiba akümtsü: IMD aser taruba anogo ana tsüingda north-northwest tsütsüleni aontsü, ta India Meteorological Department (IMD)-i metetdaksü. June 8 ayaterm 11:30 ako nung iba yipru mopung tesashi ya Goa nungi kilometer 840 aser Mumbai nungi kilometer 870 shi pilar east-central

weather department-i, "VSCS BIPARJOY tang east-central Arabian Sea nung lir, June 8 anepdang 05:30 ako nung Goa nungi kilometer 860 aser Mumbai nungi kilometer 910 shi pilar lat 13.9N & long 66.0E anasa liasü. Iba yipru ano tesashiba akümtsü aser north-northwest tsütsüleni aontsü," ta metetdakja liasü.

India nung Coronavirus agi teshirangdakpur 2,555 dang kümogo

New Delhi, June 09 (Agencies): Tesüiba anogo ka tsüingda India nung nisung 169 dak coronavirus putet aser tang linük nung iba tashidak agi teshirangdakpur 2,555 dang kümogo, ta Hokolbar nü Union Health Ministry-i metetdaksü. Tesüiba ghonda 24 tsüingda linük nung coronavirus agi shiranger ana asü aser ibaji densema tang tashi nung linük nung iba tashidak agi shiranger 5,31,888 süogo.

Linük nung nisung crore 4.49 (4,49,92,462) dak coronavirus putet aser tang teshirangdakpurtemji caseload nungi shilem 0.01 dang lir aser iba tashidak agi shiranger shilem 98.81 anepogo, ta health ministry-isa metetdaksü. Health ministry website ajanga ashiba agi, tang tashi nung linük nung coronavirus vaccine dose ajak senteper crore 220.66 dak tema agütsüogo.

India nung nütsüing shilem 11 diabetes agi shiranger: ICMR

Chennai, June 09 (Agencies): Tang India nung diabetes agi shiranger million 101 kümogo; 2019 küm nungbo linük nung diabetes agi shiranger million 70 dang liasü, ta ICMR-i metetdaksü. ICMR study ya UK medical journal 'Lancet' nung adokja liasü. Terenlok aliba state kar nungbo diabetes agi shiranger kanga merenloker, ajisüaka state aika nung diabetes agi shiranger teimba-teimba dang kümdar, ta ICMR-i metetdaksü. Iba dak alia India nung nisung million 136 (nütsüing shilem 15.3) dak pre-diabetes lir. Diabetes agi shiranger teimba aliba state ji Goa (shilem 26.4) lir, iba sülen Puducherry (shilem 26.3) aser Kerala (shilem 25.5) state tem lir. Linük nung diabetes agi shiranger million 101 dak tema kümogo aser ibaji nütsüing shilem 11.4 lir. Tang diabetes agi shiranger ajema aliba state tem-Uttar Pradesh, Madhya Pradesh, Bihar aser Arunachal Pradesh state tem nunga taruba küm ishika tsüingda diabetes agi

shirangertem aika akümtsü, ta ICMR study ajanga metetdaksü. Madras Diabetes Research Foundation nung Tir aser ICMR study nung shilem agir, Dr Ranjit Mohan Anjana-i, "Goa, Kerala, Tamil Nadu aser Chandigarh nung diabetes agi shiranger aika liaka item states nung pre-diabetes case bo ishika dang lir. Puducherry aser Delhi na nungbo diabets agi shirangertem aser prediabetic ji kasasa dang lir, anungji yangjibo iba tashidak azüoktetdar, ta ashitsü akok," ta metetdaksü. Ajisüaka diabetes agi shiranger ishika dang aliba state kar nung pre-diabetic aika aliba scientist temi jangjaogo, ta paisa metetdaksü. Tatishitsü agi, Uttar Pradesh nung diabetes agi shirangertemji nütsüing shilem 4.8 dang lir aser ibaji linük nung shilem tajemtiba lir, ajisüaka iba state nung pre-diabetic bo nütsüing shilem 18 lir, aser ibaji national average shilem 15.3 dang nungi teimba lir. "Uttar Pradesh nung diabetes agi shiranger nisung ka shia pre-diabetes keta alirtembo nisung pezü lir. Iba tetezü item

nisungtemjia kobi melii diabetes agi shirangtsü," ta Dr Anjana-ashi. "Madhya Pradesh nung diabetes agi shiranger ka lira pre-diabetes keta alirbo nisung asem lir, ano Sikkim nungbo diabetes agi shirangertem aser pre-diabetes keta alir naprong aika lir. Item kuli ya bushisüingdangtsü nungdak," ta lai ashi. "Pre-diabetic nisung kaji normal blood sugar level dang nungi tera temaba lir saka 'type-2 diabetes' ta züingshitsüsa kanga 'high' bo masü. Taküm libaluru memelenshira pre-diabetes keta alir tanur-tain aika diabetes agi shirangtsü. Pre-diabetes keta alir nisung asem shia nungi nisung kabo küm ishika tsüingda diabetes agi shirangtsü aser pre-diabetic nisung asem shia nungi nisung kabo pre-diabetic dang alitsü," ta senior diabetologist Dr V Mohan-i metetdaksü. ICMR-i iba study atema October 18, 2008 nungi December 17, 2020 tashi nung yimtsüing aser jilattem naprongla nungi nisung lakh 1 dak tema tendanga liasü.



Ranchi, June 09, 2023: Linük nüchiso atema rarar, Birsa Munda asüba anogomong nung Ranchi nung Union Tribal Affairs Minister, Arjun Munda-i asür nem akhüm agütsüba sülen tangokba noksa nung angur.

Nisung kari social media ajanga NCP tongti Pawar amokmeren

Pune, Aami/June 09 (Agencies): Nisung kari socail media ajanga Nationalist Congress Party Tir, Sharad Pawar amokmerenba sülen Maharashtra nung Eknath Shinde-i aniba sorkari pa nem security agütsüogo. Hokolbar nü osangbenertem den jembidang pai, amokmeren ajanga nisung ka ola nembangtsütetsü ta nisung kari bilemra nisungba tangatetbaji tai, ta ashi. Pawar-isa, pai Maharashtra police dak tamang akar, ta metetdaksü. "Linük nung onük balala nung pei tebilemra lemsateptsü atema senso ajak dak temeden lir. Ajisüaka nisung kari, amokmeren ajanga nisung kar ola nembangtsütetsü ta bilemra iba tangatetbaji tai," ta pai ashi. Nisung kari social media ajanga arrshi küm 82 NCP Tir, Pawar amokmerena "Kobi melii nai-a (Narendra) Dabholkar-i ajuruba kasa tia ajurutsü" ta metetdakja liasü. 2013 küm August 20 nü Pune nung Narendra Dabholkar anepdang senzua lia motorbike nung nisung ana arur pa dak injang khalokja khaseta liasü. Pawar-i, "Ni police dak tamang akar; state nung tzüzüing ozüing benoktsü aser tensa azüoktsü atema parnok nem mapa nunglokja lir, ibayongji ni shisa mebular," ta ashi.



June 09, 2023 nü New Delhi nung Ato kilonser Narendra Modi aser ChatGPT maker OpenAI CEO, Sam Altman na senden amendang tangokba noksa nung angur.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 10, 2023


Chiyongtsü memerüki amshir!

Dimapur nung ice cream yangludak tesem ka nung ice cream yangluba tzüji songtsü aser ice cream yangluba auso nungbo koya senzür ta local tv ka nung sayuba angu dang saktsünütsü atua reprangogo. Atangji, taintemibo aikati ice cream machir saka tetsür tanurtemi, tang ama lemiwa, kanga sapua achiba chiyongtsüji ice cream lir. Atangji, ice cream ya tachitsü tajung aser tanang dang masü saka tereprangtsüa kanga junger, ajisüaka ibaji shirnoki kong koma yangluar tachirtemi memetet achir. Ashiko, tachirtemi ice cream yangludakji angu nungbo, teyanglurtem dang-dang masü saka tayokertem dena merenshinüa aittsü aser taküm piyong ice cream machitsü nangzüksüa akok. Asenoki mereprangdang aser tetendanga metendang dang ashi, ice cream dang masü saka asenoki achiba amtsüktem ya teimbaka tesem tesempatsüka nung koya den raktepa tebena memetsük aser tetsünga meshidok ser mashimashi memerüki yanglua alitsüa akok. Ajisüaka, chiyongtsütem rongnunga yanglurbo amtsüksa topur tajungba angur, anungji asenoki kecha marendaki jangratema alia achir. Ano, chiyongtsütem rongnung totzü teimba amshia yangluba chiyongtsüji amtsük ya lir aser amtsük yangludak tesem aika nung sen jenjang tajemba aser dalangba totzü mesüra totzü tejen amshir, iba jagi tayokertembo tajangzük talila angur saka talir aser tachirtembo chiyongtsü masü tashidak alia achir akümer. Koba chiyongtsü südir süang, asenok taküm alitsü atema achir, anungji asen temang ya asenoki achiba aser ajemba dak keta lir. Aji oda, asenoki achiba chiyongtsütemji memerük aser junga mawazüba chiyongtsü süra iba jagi asen temanga memerük akümer. Tatsüba nung asenoki chiyongtsü tamajung chira asenok temang mejungi akümtsü aser chiyongtsü tajung chira asen temang junga dang alitsü. Atangji, asenoki iba tashijibo meteta lir, anungji asenoki asenoksasa kidang awazüa achiba chiyongtsütembo tajung, temerük aser kanga junga anepalua awazüa achir. Ano, tanü asüng balaka asenok aikati temang anepalutsü kanga shia kümogo, iba jagi asentzü sena mapa meinyakertema anogo nung khenbo temang arakzüka asentzü aludakja belemdaksür aser chi aser shi dangbo süngolemba aser süngjanglijang teimba achir. Iba amaji nisung aikati dokan nung ayokba amtsük, ice cream aser chiyongtem machitsü meranger. Asenoki alu mayimba agi makoker dang ashi, dokan nung aliba jang yabo teimbaka temang atema majung, anungji takokeribo pei chiyongtsübo züsentetsüsa alu ayim nunga junger. Atangji, pei kidang chiyongtsü temerük tajung peria alitsüa akok saka amtsükbosa dokan nungi alia achitsü. Aji oda, talisa tanurtemi dokan nung aser lenmang nung yoka aliba ice cream machi maremtsü, anungji amtsük aser ice cream yangludak tesem aser parnok inyakyim ajak mapang mapang shia teinyaktsü purtemi mita reprangtsüla. Tangar state nung ama asenok state nunga nüboritem asoshi chiyongtsü yanglua ayokbatem ya tendangtsü aser repranga mittsü atema government-i ita sen agütsür Food Safety Authority nung inyakeritem yua lir. Nisunger yimya asünungji, aikati talir nem parnoki agütsüba sen jenjang yari chiyongtsü tajung aser temerük agütsütsü mebilemi tajangzük dang bushir. Anungji, government tashi amer kari mita mereprangra, nisung aikati tangar dang ayoktsüba amtsük amsangbo mashimashi yanglur ayoktsü. Tangarbo machine amshia light nung yanglur saka asenokbo light-a mali aser senotsüa maka nungji, akhi inyakba yimya nung dang kari teben agi ajeper aser kari tetsüng agi ajemer ta amtsük amsangtem yanglur. Tang Nagaland nung dokan tapu balala lapokyonga aobaren nung mozü ayokba aser amtsük ayokba dokan nasa teimba asütsüsa lapoka lir. Anapronglaji nisung ka taküm aser temang atema kanga tongtibang lir. Mozüa aser amtsüka asen temang telongi yoker, anungji item jagi asen temang telong nung mapa inyakba dak asen tepela-tejashi aser asen arishi keta lir. Atangji, pei taküm, temang aser arishi atema dang asünungji, Health aser Food Safety Authority nung inyaker teinyaktsüpurtemi meinyakra, asenoki parnok mapaji benzüka inyaktsüla, kechiyong ibaibo asen taküm aser temang na atema tasü o taküm na bendangba mapa ka lir.

OLEMSABANG

Urinary tract infections (UTIs)

Source : Internet



Urinary Tract Infection (UTI) ya kechi?

Urinary tract infection (UTI) ta ajaba ya natzü aoba shilemtem (urinary tract) nung mesen ajanga timtem adokdaksüba dang ajar. Urinary tract nung tezüngjang, poktsütem, natzü anaba tezü nunger densema lir. Kinü tanur tejempi aser natzü anaba shilem nung aliba teküp nungi mesen natzü anaba tezü telungi atur. Iba ya ajanga natzü anaba tezü telunglen wakdaksür aser natzü junga menateti temang nung timtem adokdaksür. **Kodaser kinü tanur dak UTI keta aliba metettsü?** Kinü tanur dak UTI aliba metettsüji kanga tasak. Kinür tanurtem dak tsünglanglen agüja aliba yimya agi temang nung timtem adok nungbo, pa/la UTI agi kangshir ta tetsütsü akok aser doctor nem tendangdaksütsüla.

- * temang metaa shirangba,
- * saktsüba,
- * anibelem,
- * tiptema mekazüi petsaprongba,
- * chiyongtsü junga machiba,
- * temang taintsü yim meinlokba,
- * jaundice,
- * natzü nung teshinem tasa menemba,
- * natzü memerüki anaba,
- * natzü nung azü densema anaba.
- # Kinü tanurtemi parnok sasa timtemba meshiteter, anungji asenoki parnok dak UTI shirang ajitettsübaji mapang shia temang meta shirangba asütsü.
- # Kinü tanurji kanga tila mesüra, pa/la natzü kanga anatsü aser natzü anadang ashitsü. Tashi maremba agi natzü anatsü nungnangtsü akok. Ano tepok ashir ta o jembitsü ashirtemibo ashitsü.
- # Kinü tanur dak UTI lir ta nai temulung meleme bilemra, tekaratiba nung doctor dangi anir oa tendangang, kechiyong mapang talangka anepalu masü toktsüra, mesenji tezüngjang tonga atutsü aser timtem tuluba adokdaksütsü. UTI timtem tuluba adokbaji arishi küm 2 nungi teküpokpurtem dak timba ataloker.
- # Kinü tanur karbo UTIs melamela adoker, saka item mapaya inyak nungbo kinü tanurtem UTI timtem nungi kümzüka ayutsü. Kinü tanur indang diaper melentsüdang, tejaklen nungi tenzüker tesülen tashi jungjunga shidokjang. Nai mezüng tejembilen nungi tenzüka merüksüra natzü analeni mesen atutsü zübazübar asütsü.
- Tzü-scü bendenba sü mapang shia melenjang.
- Kinü tanur nem tzü peria jemdakjang. Iba jagi pa/la temang nungi mesen odaktsütsü.
- Nür tanur o jembi shia meteta akümba sülen pa/la sasa merükmejutsü sayuang, talisa natzü anaba aser scü kozüba sülen tejaklen nungi tenzüker tejembi tashi jungjunga shidoka merüksü sayuang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Madhya Pradesh nung court-i pastor ana nem bail magütsü

June 09, 2023: Central India nung aliba state ka nung protestant pastor ana aser tetsür kati tangartem Khristan yimsü dangi meyipdaksüogo, ta tai tonglokja apuba sülen tang tashi mechioker.

Madhya Pradesh state kübok Satna district court-i June 6, 2023 nüa pastor Roshan Faster, pastor Mayaram Ningwal aser Aarti Saket nung bail temepishiba magizük.

Par asemprong June 17 tashi police ket nung ayutsü.

June 7 nü osangbener den jembidang Khristantem temeden atema inyaker, Minakshi Singh-i, "Tang mapang ya onok atema timtemba mapang ka lir. Onoki maneni legal team ka den inyakdar," ta metetdaksü.

Pastor ana denji tetsür ka densema June 4 nü Satna district kübok Motwa

yimdak apu. Yimdaklir, Manoj Kori-i Hindu nung telok, Bajrang Dal (Brigade of Hindu god Hanuman) dang, ki ka nung Khristantem adenshia sarasademdar, ta osang metetdakja liasü, iba sülen Bajrang Dal züngsemtem den police telok ka kiji mita aruba sülen Faster, Ningwal aser Saket nung police station-i puer ao.

Chitrakoot nung sub-divisional police officer, Ashish Jain-i, Madhya Pradesh Freedom of Religion Act, 2021 ozüing kübok parnok anema ken o ka benokogo, ta metetdaksü.

Uttar Pradesh nung amenoka aliba Khristan melungtet telok Charity in Compassion nung general secretary, Minakshi Singh-isa, north India nung aliba state tem nung, Khristantemi ozüing alema yimsü meyipdaksür ta

tai tongloktsübaji tang tasen masü, ta metetdaksü.

"Ajisüaka court nung parnoki Khristantem anema kuli magütsüteter, kechiyong tamangba yimsü meyiptsü ya nisung ka kija melung. India linük temzüng ajangaa asen yimsü tangar den lemsateptsü asenok dang melar," ta lai metetdaksü.

Tang Madhya Pradesh nung BJP sorkar lir aser tang linük nung anti conversion ozüing benoka aliba state 11 rongnung Madhya Pradesh-a densema lir.

Madhya Pradesh nung anti conversion ozüing alema inyaker tem küm 10 tashi tepuokdak ayutsü aser senchi-a achitsü akok.

Nütsüing million 72 aliba state nung Khristan nütsüingbo shilem 0.29 dang lir aser Hindu nung shilem 80 dak tema lir.

China nung Khristan kaketem menüingba atema Khristantem apu

June 09, 2023: China kübok Shandong province nung aliba court kati pastor ka aser pa den külemi inyaksemer ka tepuokdak ayutsü obendang agütsüogo.

Independent house church-Beijing Lampstand Church nung Pastor, Qin Sifeng aser pa den külemi inyaker Su Minjun nati ozüing alema business inyaker, ta tena nem tai tonglokja court-i pastor küm pongu ser tesadang tepuokdak ayutsü aser Su küm asem ser tesadang tepuokdak ayutsü obendang agütsüogo, ta June 6 nü ChinaAid-i metetdaksü.

April ita nung tena anema ken o angadanga liasü saka obendangji tang ang yimjak nung metetdaksür, ta ChinaAid-isa metetdaksü.

Yaküm July ita nung tena Yunan province-i aoba mapang nung apu aser August

ita nung Shangdong kübok Zibo nung aliba police-i tenati ozüing alema business inyaker, ta tai tonglokja Zibo Detention Center nung pua ayu.

Yangji aliba Khristantemi ashiba agibo, Arogoi osangtajung ken kaketem aser Khristan kaketem kar menüingba sülen ktdangsertemi pastor Qin aser Su na apu.

Tenük kuli alirtemi ChinaAid dang, ken o angadanga aruba mapang nung Khristantemji ozüing alema inyaker nisung kanga tamajungertem ama züngshi, ta metetdaksü.

Pastor Qin Sifeng-ibo, pa tepuokdak liaka pa pelar, kechiyong iba ya Khrista osangtajung proktsü atema maongka tajung ka lir, ta ashi.

Osang angazükba agi, China linük tesem balala nung

aliba tepuokdak alir pastor aser Khristantemi jail telung nung tangartem den Khrista osangtajung lemsateper.

China linük temzüng nung Arrla 36 ajanga tamangba yimsü ajak sadoka amangtsü temeden agütsür, ajisüaka tamangertemi Communist tangatbatem agizük nung ang item temeden angur, ta Human Rights Watch-i metetdaksü.

China nung Communist sorkari maneni yimsü temeden anema inyaker aser tamangertem reshikangshir. Linük nung Khristantem amokmerener, reshikangshir, apur aser mapang talanglang tepuokdak ayur.

US nung amenoka aliba Christian group Open Doors-i ashiba agi, tang alima nung Khristantem alitsü linük tamajungtiba 50 rongnung China ya jenjang 16buba nung lir.

ANOGO ABEN TSÜNGREM DEN

Mozü Tajung

T. Ken 107: 16 - 21.

Tsüingsang Mopung (T.Ken 107:22-31)

Item tekongtemi tzüyim nung yipru mopung aliba sayur. "Kechiyong Pai melar, aser yipru mopung adokdaksür koba agi iba nungi tzüsem adokdaksür. Parnok anüangi atur, tanaben parnok tzüyim taroki alur: timtemba yong parnok tanela yimsa aor. Külen-külen i parnok naizür, aser yi pur ama mangmanger, aser parnok kechi mesayangi lir" (t.25-27).

Tzüyim yipru asenok taküm dangia arur. Kechi agi aji adokdaksür? Ken ken tangar ajanga aji adokdaksür. T.Mapa 27 nung Paul taküm nung yipru adokdaksü kechiaser rong nung tanishirtemi Tsüngrem O nung mamang. Khen khen asenok tendangtsü aser yanglushitsü asoshi Tsüngremi adokdaksür. Mathi 14 nung Yisui nütsüingtem tamang tendangtsü asoshi yipru tiyongi yok. Khen khen tashi mangaba ajanga asenok sasa yipru adokdaksür- Yona ama Tsüngrem nungi jena aor aser Pa dangi tanaben anir arutsüba lenmangji yipru yoktsübaji dang lir.

Saka yipru tulutibaji Kalvary nung adok. Ghonda asem anüi tesangwa magütsüi mangadok aser Tsüngrem chir asenok asoshi temenen kümdaksü, Tsüngremer yipru ajak aser o bendangba kangki nung Yisu dak adok. Pai iba yipru mopung adokdaksü nung asenoki Tsüngrem dang ayimtentü akok. Pai asenok taküm yipru nungi kümzüksü akok mesüra iba ji ajanga anitsü akok, asenok nem nungdak tashi agütsütsü aser ajungshitsü akok. Ken züluri nangzüker, "Pai yipru tesüngjem kümdaksür, anungji iba tzüsem marakzüi lir. Idangji parnok pelatep, kechiaser parnok ajemajema ali; anungji Pai parnoki yongyaba tejennokdak ki anir aru" (t. 29,30).

Tanü nai yipru ajurur asü? Ibaji süngjemdaksütsü Tsüngrem dang tashi aser tajungshiba asüngdangang. Aser angatettsü asoshi shisatsü meshiang, ibaji teindok tekümdaksü.

Sri Lanka nung Arogoi sorkar dang election agitsü mepishir

June 09, 2023: Sri Lanka angutsü tsübuba agi election nung Catholic Arogo nung mayongzüker, ta aikati tongti, Cardinal Malcolm

Ranjith-i sorkar dang nüburtem democratic temeden atema elections ayongzüka agitsüla, ta mepishiogo.

June 8 nü Ranjith-i, "Vote ya temeden ka lir aser asenoki iba temedenji sorkar nungi angutsüla. Iba ya temeden ka lir aser linük tarutsü jenjang latettsü atema arrshi küm 18 ser tempur ajak dak temeden lir," ta ashi.

Councils menden 340 atema local election taküm April 25 nü agitsü liasü saka senotsü peria maliba ajanga election atsülangogo, ta election commission-i metetdaksü.

March 9 nü Sri Lanka Acting president, Ranil Wickremesinghe-i, linük nung rongsenkettzüng tebilemtsü atema nüburtem nem mesüngjem tashi local elections magitsü, ta metetdakja liasü. Tang aliba sorkari tamakok

Linük yimtiba, Colombo anasa Kochchikade nung aliba St. Anthony's College nung sentong ka nung jembidang Ranjith-i, "Temedan agi temeden maliba kümdaksüogo, yimsüsüba ya kijai tashi amshiba kümdaksüogo aser ozüing agi ozüing maliba linük kümdaksüogo," ta ashi.

Linük rongsenkettzüng tsütsü timtem nungi kümzüksü atema sorkari March ita nung International Monetary Fund (IMF) nungi dollar sen billion 2.9 loan nguogo, ta shia Ranjith-i, "Mezüngbo sorkari electiona gitsü atema sen mali ta jembir, aser tangbo sen lir ta jembir. Sorkar ket nung sen lira nüburtem taginüba metettsü atema nüburtem nem mesüngjem tashi local elections ayongzükanag," ta paisa metetdaksü.



Beijing kübok Shunyi nung aliba underground Arogo ka nung Khristantem tekülem sentong agidang tangokba noksa nung angur.

AO OSHI ANGAZÜKDAK:
TANÜ ANGAZÜKTSÜBA OJANG



Rangset

(v) nok mesüra süngratsü agi ranga südaktsü (death by sawing or cutting)
* Oboula nem an ka rangseta tetsü jemdaktsü.

Rangshia

(v) tenük tuluka saker longshia repring (stare at with rolling eyes)
* Kü tesayuri kü dak rangshia-rangshia repringer ao.

OLONG PAITEP # 6541

	1		2					3
4		5						
			6					
7						8		
9						10	11	
12								
						13		
14								

TIPIEN

- 2. Tambur makümba mapang - (7)
- 4. Aon mali - (4)
- 6. Tetsüng tsünglanglen - (6)
- 7. Repringdaktüsü - (4)
- 8. Shiruru apuba - (4)
- 9. Ya - (4)
- 10. Yangkhu - (4)
- 12. Kisüng / Tesa - (6)
- 13. Lenmang aika nungi - (4)
- 14. Aou nung chiyongtsü asenba - (7)

LANGTSÜNGLEN

- 1. Ashiba meinyak - (5)
- 3. Teberem nung benlok - (5)
- 5. Tenük agi penzü - (4)
- 6. Tekolok tajung - (7)
- 7. Nguyutep - (7)
- 10. Ki meketbangba - (4)
- 11. Lemdang - (5)

OLONG PAITEP # 6540 TELANGZÜBA

TIPIEN :

- 2. Pongsen, 5. Lepko, 7. Omen,
- 8. Maongka, 10. Yangkhu,
- 12. Senpong, 14. Angu,
- 15. Raksa, 16. Arameso,

LANGTSÜNGLEN :


- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

NAI-A YA METETTER MA



Moscow yimti nung 1990 küm mezüngbuba McDonald restaurant lapokba anogo nung iba jagi tudangtsü atema nüburtem tarensena nokdaka aliba idagi noksa nung angur. McDonald restaurant ya alima ajungalen kanga dang nüngtugu lir.

Noksa nung meputepi aliba 5 bushiang



Arunachal Christian Forum-i Manipur atema tebilemstü abener



Itanagar, June 9, 2023

(Agencies): Manipur nung ozüing alema inyaksangshiba aser Khristantem dak tenük yoka mapa tamajung inyakba atema tebilemstü abener ta Arunachal Christian Forum (ACF)-i metetdaktüsü.

"Kin ana rongnung ka nem ST jenjang agütsütsü memulungba ajanga meputep adok aser iba nung tamangba yimsü onük nung ajemdaker

inyaksanshir ama ajiteter" ta ACF-i ashi.

"Mi senoktsüba, auyaba aser nisung tepsetba manener. Iba ya kin o kin tsüingda rara masü kechiyong Hindu Meitei nungeri Meitei Khristantem indang tenla ki raksatsür" ta ACF-isa metetdaktüsü.

"Government armory nungi prangpong-injang aika auyaa bener aoba ya sorkar den

amalitpep lia inyakba ama lir kechiyong sorkari ozüing alema inyakertem den yariteper" ta Arunachal Christian Forum (ACF)-isa ashi.

Centre sorkari Manipur nung 'raj dharma' ta ajaba tamakok anguba aitsür aser Arunachal Pradesh sorkar dang Manipur nung yimjung bener arutsü atema akokba tashi yariteptsü ayongzüker, ta ACF-isa ashi.

MNF-i Manipur lisopur MLA temi akhangba pusemer

Aizawl, June 9, 2023

(Agencies): Manipur nung lisopur MLA 10-i "separate administration" akhangba pusemer ta Mizoram nung ruling Mizo National Front (MNF)-i metetdaktüsügo.

Iba osang ya MNF youth president Zodinpuia-i Aizawl nung osangbener den jembidang ashi. Manipur nung lisopurtemi "separate administration" akhangba nung MNF-ia pusema nungiter ta Zodinpuia-i metetdaktüsü.

Mizoram nung ruling party-i

akokba tashi Manipur nung ozü adianutem yaritsü ta paisa ashi.

"MNF-i maneni Manipur nungi lisopurtem nem humanitarian assistance agütsütsü" ta paisa shisem.

Mizoram nung tang Manipur nungi jena aruba lisopur 10,000 tema shi jenoka lir.

Parnok teimba ka community halls, schools aser makeshift relief camps nung anenzüka lir.

Kolasib aser Aizawl district tem nung nisung 7000 tema lir aser Saitual district nung nisung

2400 tema jenoka lir.

Manipur nung tensa mejungki akümba sülen lisopur MLA 10-i separate administration meshiba atema assembly-i parnok nem show cause notices agütsügo.

Manipur assembly indang Ethics and Privilege committee-i lisopur MLA nem show cause notices agütsü.

MLA 10-i Manipur legislative assembly indang ethics anema Manipur state loksa aotsü indang takhangba agütsü ta committee-i ashir.

US-i Assam sorkar dang US sepaitem bushiba nung yaritsü mepishir



Consul General of USA, Kolkata Melinda Pavek-i June 8, 2023 nü Assam Chief Minister Himanta Biswa Sarma den ajurutepdang agiba noksa ka angur.

Guwahati, June 9, 2023

(Agencies): United States-i Assam sorkar dang Second World War mapang US sepaitem asüba teret bushitsü atema mepishia metetdaktüsügo.

Consul General of USA, Kolkata Melinda Pavek-i June 8 nü Assam chief minister Himanta Biswa Sarma nem iba temepishiba agütsü.

"World War mapang Assam

nung American nungeri sepai 1000 jungnüa taküm samaba US Consul General-i bushiba nung yariteptsü mepishio" ta CM Himanta Biswa Sarma-i ashi.

CM Sarma-i US Consul General dang US sepaitem teret bushiba nung akokba tashi yariteptsü nangzüker.

Second World War mapang Allied forces atema Assam ya kanga dang tongtipang tesem

ka liasü. Talisa Japanese sepaitemi Burma (Myanmar) atsünga agiba sülen Assam ya kanga tongtipang tesem ka aküm.

Second World War nung Allied forces-i Burma campaign inyakdang Assam nung parnok tesep nungi inyaka liasü.

Iba mapang Allied forces indang raradang amshiba tayimtsü aika Assam arem-min nung tsükok.

GOVERNMENT OF NAGALAND
INVESTMENT & DEVELOPMENT AUTHORITY OF NAGALAND
NAGALAND: KOHIMA

NO.IDAN/INVEST/PROJECTS-74/2023 Dated Kohima, the 9th June 2023

ADVERTISEMENT

As part of providing higher educational opportunities in renowned colleges, IDAN through Edu Connect has reserved seats for students from Nagaland in the following colleges:

LIST OF INSTITUTES	
Holy Grace Foundation, Thrissur District, Kerala	Manipal Academy of Higher Education, Karnataka
Acharya Institutes, Bangalore	Godavari Institute of Engineering & Technology, Andhra Pradesh

Features : 1.No Entrance for students nominated by IDAN to the institute.
2.Fee Concession from 25% to 100% depending on the Institute.
3.Renown and reputed Institutes of India
4.Scholarships/Study Loans to be facilitated by IDAN case to case basis on professional courses.

COURSES WITH SCHOLARSHIP			
B. Tech:	Acharya, Holy Grace, GIET	BCA	
B. Com:	Acharya, Holy Grace, GIET	BSW	Acharya
B. Com (Aviation)	Holy Grace	BA (Journalism, Psychology & English)	Acharya
B. Com (Logistic)	Holy Grace	BA (Visual Arts)	Acharya
BBA	Acharya, Holy Grace, GIET	B. Sc	Acharya, GIET
BBA (Aviation)	Holy Grace	B. Sc (Forensic Science)	GIET
BBA (Logistic)	Holy Grace	M. Tech	GIET
M. Com	Holy Grace	All Paramedical Courses	GIET, Manipal

Limited Seats available. **For further information, contact:**
Dr. Arenla (HRD Consultant, IDAN): +91 8787695240
David Kire (OSD & Consultant, IDAN): +91 7005124584
Email: idan.nagaland@gmail.com

OFFICE OF THE
VILLAGE COUNCIL MERANGKONG
P.O. TULI, B.P.O. MERANGKONG - 798618
DIST. MOKOKCHUNG : NAGALAND.

Ref.No. Date

KÜMREMI PELAR

18th April 2023 nung yipru tesashi arua Merangkong yimtsüng nung ki 24 raksatsür timtema aliba mapang, wabong A.Pangjung Jamir, MLA Advisor Fisheries and Aquatic Resources Govt. of Nagaland, pai teyari Rs.2,50,000/- agütsüba asoshi Merangkong Village Council-i kümremi pelaba lemsateper.

Tsüngrem-i samanir taküm maneni talubosa moajangma.


 Sosangmanen
 Chairman
 Village Council Merangkong


 Arentoshi
 Secretary
 Village Council Merangkong

ALI TAYOKTSÜ LIR

AT SEITHEKIMA (A) Near Nagamese Church
Dry Land, Rs. 95 Per Sq.ft (Negotiable)
Plot size available as per your budget.
Contact: 9612448446 / 8974571416

GOVERNMENT OF NAGALAND
DIRECTORATE OF TECHNICAL EDUCATION
Nagaland : Kohima - 797 004

0370-2270409
0370-2271432

NO.DTE/SCTE/6/2020-21/4607 Dated, Kohima the 9th June, 2023

NOTIFICATION

NO.DTE/SCTE/6/2020-21: In view of some seats still lying vacant under Government run Polytechnics, the interested candidates are hereby informed to collect application form and submit filled form to the nearest Polytechnics or Directorate of Technical Education Kohima on or before 23rd June 2023 for admission.

The prescribed application form is also available in the website www.dtenagaland.org.in

Sd/-
(Er. VIPULHOU LHOUGU)
Director

Afghanistan mosque nung nisung 11 pokset



Bangladesh nung Rohingya nungertem kidangi onür longkak aiter

Cox's Bazar, Aami/June 09 (Agencies): Bangladesh nung aliba Rohingya nung meyirijang aika par linük Myanmar-i meyipa yokang ta longkak aiter, shirnok 2017 küm par lima nung mitkar temi tashiyim amshiba mechi jena arua refugee camp temesü nung alir.

Rohingya nung million ka dak tema southeastern Bangladesh nung refugee camp tem nung tsüngtena lir, koba alima nung refugee timtiba aliba tesem ka lir. Nisung timbaka Myanmar mitkar temi küm trok jakdang pua merenshiba mechi jena aru, aser kar iba dang tama nungi alir.

June 1 nü World Food Programme ajanga iba tesem nung alir nisung shia sen \$10 agüja aliba sen \$8 kumtsü. Alima nung refugee tem atema teyari agütsüba ajemba mechi March ita ration cut ya sen \$12 aliba nungi sen \$10 kumja liasü.

Brehostibarnü mürekmeju maliba camp tulutem nung longkak aitdang Muslim refugee tem, tanur aser tain temi placards amer yimyim ayima liasü.

"Refugee takum ojang alitsü. Verification malitsü. Scrutiny malitsü. Interview malitsü. UNHCR data card ajanga onoki tekeraba nung ozü limai meyipa oner. Onoki ozü tetsü tasoli bushia meyipa oner," ta placards tem nung zülua liasü.

"Onok Myanmar-i meyipa oti. Ozü limai meyiba aoba anendaktsütsü temerang," ta placards kar nung zülua liasü.

Longkak aiter kati, tensa maneni tamajungba kumra onok takum alitsü asoshi chiyongtsü auyatsüsa akumtsü, ta osangbener dang ashi.

Teknaf refugee camp nung

alir kati osangbener dang ashiba agi, "Onok Myanmar senso lir. Onok kidangi senso temeden bener meyipa aotsü aser Myanmar nung lendong timtem majurui alitsü akhangba alimai angashitsü ajungshir."

UN ajanga chiyongtsü asoshi teyari agütsüba ajemtsüba ajanga teopk masünger, ta pai ashi. Ration ajemtsüba ajanga tetsür aser tanurtem dak tali kongshir, anungji UN densema alima nung alirtemi tekeraba nung nungdakba chiyongtsü teyari agütsüdaktsüner, kechiaser refugee tem teyari agütsüba nung metaloka alir, ta ashi.

Taoba hopta UN deputy high commissioner for refugee, Kelly T Clements-i anogo pezü refugee camp tem semdangba mapang, refugee tem nungdakba ajak humanitarian aid nung metaloka lir, ta ashi. Ajisüaika iba teyari atema senotsü mangur, ta lai ashi.

Bangladesh nung Rohingya nung yaritsü atema humanitarian agency temi sen million \$876 dak tema nungdaker ta shia liasü. June 2023 tashinung parnok yaritsü atema Join Response Plan-i nungdakba shilem 24 dang nguteta liasü.

Rohingya nung lenir Mohammad Jashim-i pa Myanmar-i meyipa onür saka pa indang senso temeden wazüka yudaktsüner, ta ashi.

"Onok ya tasongdang nungi Myanmar senso lir. Senso temeden, senzüsempongtsü temeden, takum litettsü, takum kumzuka alitsü temeden densema ozü temeden ajak bener kidangi meyipa onür. Anungji UN ajanga yaritsü imlar," ta pai ashi.

Myanmar mitkar temi tawa tashi Rohingya nung meyipa

agitsü tejangraba mesayur, shirnok küm aika Myanmar nung bendanger menüngdakba nisung ama züngshir aser senso temeden magütsür aser merenshia amshir.

2018 aser 2019 küm parnok meyipa yoktsü merang, saka reshikangshi tetsübo nung meyipa aotsü memolung aser iba sentong nung tamakok ajurua liasü.

Pei sasa molungsoa meyipa aotsü asoshi ajungmesotsü nukjidong nung shilem ka ama par tasoli semdangba sülen Rohingya nung nisung 20-i tentetba telok kati camp tem nung alitsü atemabo Myanmar-i meyipa monür, ta shia liasü.

Bangladesh ketdangsur temi ashiba agi, iba pilot scheme ya refugee 1,100 shi Myanmar-i meyipa aotsü asoshi lir, saka anogo lateta mali.

Nütsüng yongzük onsara aliba Bangladesh-i ashiba agi, Myanmar-i meyipa yoktsüba dak alaka iba timtem atema danga lenmang kecha mali.

Brehostibarnü UN special rapporteur on the human rights situation in Myanmar, Tom Andrews-i ashiba agi, Rohingya nungertem Myanmar-i meyipa yoktsü atema Bangladesh-i pilot repatriation project tenzüka aliba tangsa anentsüla, kechiaser yangji parnok takum lendongi aitsü.

Myanmar nung oa alitsü teimla makaba mechi Rohingya nungertem Malaysia aser Indonesia amala linük temi Bangladesh nungi rong tila nung aor aser parnok takum lendongi aier.

Taoba küm tzüyim nung Rongingya nung 348 süogo südi, ta UN data ajanga sayur.

Kabul, Aami/June 09 (Agencies): Afghanistan north tsütsü mosque ka anasa Taliban indang provincial deputy governor ka indang asüpila sentong nung bomb ka poka nisung 11 asü, ta ketdangsur temi ashi.

Brehostibarnü Nabawi Mosque anasa bomb apokba lendong nung asürtem rongnung taoba mapang Taliban police ketdangsur inyaka alir ka densema lir aser ano nisung 30 dak tema yiru, ta Taliban-i shimba interior ministry indang odongtar Abdul Nafi Takor-i ashi.

Iba lendong ajanga nisung asüba ya timba akumtsü akok, ta Takor-i ashi.

Iba lendong ya Badakhshan indang deputy governor Nisar Ahmad Ahmadi den asüpila sentong agidang atalok, shiba Mongulbarnü gari nung bomb pokdaktsüsang asü. Badakhshan yimtiba Faizabad nung iba lendong nung deputy governor indang driver-a asü aser nisung 10 yirua liasü.

Taliban official in charge of information and culture, Moazuddin Ahmadi-i ashiba agi, Brehostibarnü bomb lendong nung taoba mapang Baghlan indang Taliban police tekolakba Safiullah Samim asü.

Taoba Afghan Tir Hamid Karzai-i iba lendong ya aitsü aser mosque nung bomb poklokja amakba ya kiralongra map aka lir aser meimchir aser

Islamic standards anema lir, ta tweet ka nung ashi.

Iba lendong agütsüba atema tang tashi shingaia tenüng agia mali. Mongulbarnü gari nung bomb pokloktsüba atema ISIL (ISIS) teloki tenüng agia lir.

Taliban administration ajanga ISIL züngsem mita oa amaker, shirnoki jila balala nung tendong tulu agütsüba tenüng agia arur.

Iba telok yagi Taliban administration ketdangsur dak tenük yoker amaker aser March ita northern Balkh province indang governor tepsetba tenünga agia lir.

Ahmadi asüpila sentong nung Taliban ketdangsur aika dena liasü, koba Bodhbarnü agi, aser yangji Faizabad nung alir noklang aika dena liasü.

Badakhshan lendong Taliban mitkar tekolakba Fasihuddin Fitrat-i aitsü aser nüburtem dang Taliban security forces den amalitep akatsü aser temolung melemtetba inyaksangshi indang osang agütsütsü ashi.

December ita Badakhshan provincial police tekolakba mapai aodang gari nung bomb poklokja police tekolakba ya tepset.

Iba region nung ISIL den sendaktepa aliba Islamic State in Khorasan Province ajanga iba mapa ya inyak ta shia liasü. Lenmang nung tapoktsü oset inoker gari ka anena ayu aser police tekolakba iba gari anasa lia pokdaktsü, ta parnoki ashi.

Kohima nung anogo trok AIFF-D license coaching camp tenzükogo



Kohima, Aami/June 09 (TYO): Kohima District Football Association (K DFA) ajanga ayongzükba anogo trok All India Football Federation (AIFF) D license training sentong Indira Gandhi Stadium, Kohima nung June 8, 2023 nü tenzükogo.

Iba training nung main instructor AIFF D Coach Educator and AFC 'A' licensed coach, N William Koso aser liaison officer Zhovezo Resu alitsü.

Sentong tatsüka agia iba training tenzük, kong tetushi

tesemdanger Nagaland Football Coaches Association (NFCA) tir aser senior vice president K DFA, Roko Angami liasü.

Nagaland nung saisapong temaba jenjangi ajungkettsü asoshi license aliba coach tem nungdakeer, ta Roko Angami-ashi.

Saisaponger temi junga asayatsü asoshi coach tem dak tashi lir, anungji asayar tajung adokdaksütsü asoshi coach tem training shidak agitsü tongtipang, ta pai ashi.

Kidanger state tem nung qualified coaches noklang aika

lir, saka Nagaland nungbo kanga ajema lir, ta pai ashi.

Iba training nung coach atema arua adenertem rongnung football bendanga agütsür asayar tajungtem lir, ta pai ajitetba ashi.

Pai training agirtem dang 'D' license training ya 'introductory course' lir aser student coaches tem tarutsü nung professional coaches akumtsü atema foundation yanglutsür, ta ashi.

District level nung coaches temi 'C' license nungdaker aser state level atema tajemba agi 'B' license coaches nungdaker, ta pai ashi.

Course ya anogo trok atema dang süaka course mapang tajungtiba nung shilem agitsü pai ayongzükba liasü.

Tang 'D' license coaching tagidak aliba ya tatem asütsü akok, kechiaser base course atema category tasen 'E' license tenzükogo, ta Roko Angami-ashi.

Iba course tembangba sülen student coache tem ya Nagaland Football Coaches Association nung züngsem kumtetsü, kong licensed coaches 80 tashi züngsem ama lir, ta pai metetdaksü.

Iba sentong nung K DFA tir Mathew Yhome menden liasü.

2 buba Women's Championship Trophy osang

Dimapur, Aami/June 09 (TYO): Nagaland Cricket Association ajanga ayongzükba tetsür cricket asayamung, 2 buba Women's Championship Trophy Hokulbarnü asaya ka nung Pauna Queens-i toss akok aser mezüing batting shimer over 25 asayaba nung runs 75 angu aser wicket 7 out süa liasü. Iba inning nung Pauna Queens nungi Kajenkala-i dang runs 28 ngutet.

Iba sülen Japfü Dazzlers nungi asayartemi over 13.5 nung runs 76 nguteta wicket 9

agi ayong-ayonga akok. Japfü Dazzlers nungi Najmeen-i runs 12 ngutet, captain Alemienla-i runs 36 aser Tiarenla-i runs 15 nguteta liasü.

Iba asaya nung Alemienla nem Player of the Match sempet agütsü, shibai runs 36 yanglutet aser over pongu nung wicket ka agi aser yangji maiden over ka aser runs 16 agüja liasü.

Tzünglu aruba mechi Tiyi Strikers aser Terogvu Titans aser Saramati Warriors aser Puliebadze Slingers tsüngta masayatet.

Kanga yongya aliba Women's Champions Trophy indang final ya June 10, 2023 nü Japfü Dazzlers aser Saramati Warriors tsüngta Nagaland Cricket Stadium, Sovima nung asayatsü, kong tesemdanger tongti Minister, Women Resource Development and Horticulture, Govt. of Nagaland, Salhoutuonuo Kruse alitsü.

Iba asaya arua reprangtsü asoshi saisapong jangar ajak pelashishia jaoker, ta Nagaland Cricket Association ajanga sangdong ka nung ashi.

Khensa yimtak konger anepalua...

Mokokchung district nung dang masü saka Naga lima nung yimtsüing nung tazünger aser tular aika alibaji Khensa yim ya-a ka lir, item tazüngerterem aser tulartem jagi yimtsüing nung aliba nüburtem yaria inyakba angudang ya Naga nung asoshi tangazüktsü tulu lir, ta ADC Mkg.-isa ashi.

ADC Mkg., Chumlamo Humtsoe-isa Khensa nungeri konger yanglubaji takok ngua inyaktetsü aser nübur ajangzükdaksütsü asoshi kanga dang meranga inyakang aser Khensa yimtsüingji Konger Yim (Mushroom Village) ta sangdongtetsü merangang, ta adenshia aliba Khensa nungertem ajungshia ashi.

Kasa sentong nung Tsüngrem lenisüba jazüka Khensa Baptist Arogo Pastor Rev.K.Temjen-i sarasadem aser Dr.I.Amenla (Retd. Joint Director, Dept. of Agriculture); B.Imti Tzüdir, District Agriculture Officer & PD ATMA, Mkg.; Temsümongla ,tir, Khensa Sensotsür Mungdang aser Dr.Moa Walling (Retd. Joint Director Dept. of Horticulture) nungertemia shilem balala agia jembiba den Tongpangsenla, Asso. Pastor Youth, Khensa Baptist Arogo ajanga sarasadema tembang. Iba sentong nung menden Dr. Sashiyangba, District Project Officer Dept. of Land Resources, Mkg. liasü.

Khensa nung tanü Konger

(Tapak 2 nungi...) yangludak mesemtetba ya sorkar teyari kecha magi Khensa nung sarutepa tenzükba mapatong ka lir aser Naga lima nung pei sasa konger yanglutsü tenzükba ya tanabuba yimtsüing lir. Parnok achaayanger kari ashiba agi konger ya yangluteta Mokokchung nung peria yoker kelen dangar district-tem nung agütsütsü tebilemba lir.

Iba mapatong nung aluyimertem, talisa Self Help Group 10-i tongti shilem agia inyaktetsü, ta ashi.

Iba sentong temer konger koma anepalua yanglutsü, iba asoshi tesayuba sentong (Technical Session) ana (2) tashi nung tesayur mongintemi agia liasü.

Delhi Police temi tetsür wrestler ka WFI tekolakba office-i anir ao

Delhi, Aami/June 09 (Agencies): Wrestling Federation of India (WFI) tekolakbai tim masüba mapa inyakba indang bushisüngdangba nung mera agia Delhi Police-i Hokulbarnü tetsür wrestler ka iba mapa tamajung inyakba jilushi atema pa indang office-i anir ao.

Brij Bhushan Sharan Singh ki nung WFI indang office ya lir. Sports Minister Anurag Thakur-i longkak aita aliba wrestler tem dang June 15 tashinung ken o benoktsü ashi.

Delhi Police ketdangsür kati ashiba agi, wrestler ya tetsür police temi meina WFI office-i nikongdang 1:30 ako nung anir ao. "Parnok yangji minute 30 shi liasü. Parnoki la dang iba tatalokba jilushi aitsü (recreate the scene) asüngdang," ta police ketdangsüri ashi.

Police tem iba tesem yutsür orr mapang tatsüka lir angateteptsü asoshi wrestler tem WFI office tonga ao ta osang prokshiba atema wrestler Vinesh Phogat-i Twitter nung la jashiba lemsatetep.

"Ibai Brij Bhushan indang tashi lir. Pa indang shi tashi, political tashi aser tiazü jembia tetsür wrestler tem merenshir aser pa aputsü tim. Onok dak züka merenshitsü melena police temi pa pura, obendangtsü asoshi teimla lir."

"Police temi bushisüngdangtsü atema tetsür wrestler tem mapa tamajung inyakba tesemi ao, saka angateteptsü atema ao ta media nung osang prokshi," ta lai Hindi nung tweet asü.

Ano longkak aiter wrestler Bajrang Punia-ia kasashi tweet asü. WFI tir menden toktsütsü alisang aser BJP MP Singh anema ken o bushisüngdangtsü tentetba Delhi Police indang Special Investigation Team ajanga bushisüngdangba osang court nem taruba hopta tashinung agütsütsü akok, ta ketdangsür temi Bodhbarnü ashi.

Iba bushisüngdang nung shilem ka ama SIT ajanga nisung 180 dak tema asüngdangya süogo, ta Delhi Police ketdangsür temi ashi.

Asian Games gold medallist Vinesh Phogat aser Olympic medallists Sakshi Malik aser Bajrang Punia densema linük nung wrestler temi Singh anema longkak aita arur aser tetsür wrestler tem dak tim masüba mapa inyakba atema aputsü akhanger.

Longkak aita wrestler temi Bodhbarnü Sports Minister Anurag Thakur ajuru aser pai Singh anema ken o benoktsü ta ashiba sülen June 15 tashi longkak aitba anentsü molungtepa liasü.

Inter Miami-i Lionel Messi aitsü aliba ajanga fan tem pelateper

Aami/June 09, 2023 (Agencies): Inter Miami-i Lionel Messi aotsü aliba ajanga pa indang fans tem pelateper aser social media nunga followers tali akumer aser ticket kanga ayoker.

Messi-i tang tashi meyongnem magütsü, saka World Cup akoksangi Paris Saint-Germain nungi ainshiba sülen major League Soccer club dangi aotsü ta Bodhbarnü sangdongba sülen Inter Miami indang Instagram follower pongusü agi timba kumogo.

Bodhbarnü matongdang Inter Miami indang Instagram account nung followers 900,000 liasü. Osang temai adoker ghonda 24 majungdang follower million 5.7 ajung.

Tangbo Inter Miami indang social platforms ajak nung followers million 7.5 dak tema lir aser iba osang sangdongba anogo follower million pongu dak tema bendenlok.

Messi-i osang sangdongba sülen ghonda 24 tsüngta ticketing technology company Logitix ajanga ticket aginüba indang asadanga nung Inter Miami matches atema

secondary market nung ticket pezüben agi timba yoker liasü, koba anogo 169 nung ayokba den medemdangba alitsü.

Inter Miami home matches atema ticket jenjang sen \$31 aliba \$152 kumogo aser away games atema sen \$94 aliba nungi \$207 kumogo, ta company ajanga ngutet.

Taoba mapang Barcelona nungi asaya alisang ya tanaben iba club den lungjemtsü teimla liasü, kong pa küm 20 jungnüa lir PSG nung oa aden.

2021 küm Messi-i Barcelona yutsüding iba club sentsüh agi tsübanger liasü aser pa indang contract tasen kumshitsü teimla nung atatsüsa akum. Argentina nungbai meyipa shilangnü saka kasa tensa nung melinü, ta pai Spanish media dang ashi.

Pa Paris Saint-Germain nung junga melitetba sülen par kibong nung temolung tali agütsünüa liasü ta ashi.

Arishi küm 35 tain Messi nem Saudi Arabia nungi maongka tajungba agüjaka pai Inter Miami ang shim, ta ashir.

Ajisüka July ita tatem tashi pa Inter Miami nungi masayatetsü amai lir.

BILEMDANGANG

"Tepelaji alima rongsen nungi masü pei dak nungi adoker."